



Tir Yimym

www.tirymym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymym@gmail.com

TAPAK 7

Yangia anidakangma :



Tir Yimym



tir_yimym




tir yimym

TAPAK 8

Tesendaktep indang jembitsü Qatar
yimsüsüri Jordan semdanger

Aryna Sabalenka yiruba ajanga
China Open nung masayatettsü



VOL. XXII ISSUE NO. 335 (ADOK 335) DIMAPUR YANGTEPNÜ (THURSDAY) RONGJUI (SEPTEMBER) 18, 2025 ₹ 5.00

CM Neiphiu Rio-i 'women health campaign' tenzüksü

Kohima, September 17, 2025 (TYO): Chief Minister Dr. Neiphiu Rio-i tanü tetsürtem temang anema aliba aser tashi aitba ajanga kibongtem, lokti aser linük tejakleni aoer ta ashi.

"Asen kibongtem, loktitem aser linük tejakleni aotsü atema tetsürtem health aser empowerment kanga tongtipang. Kodang tetsürtem temang anema lidir, shisaliok ngudir aser tashi itdaksüdir loktiliba ajanga ajangzüker" ta CM Dr. Rio-i ashi.

Tanü Prime Minister Narendra Modi tasoba anogo den külemi Nagaland nung "Swasth Nari, Sashakt Parivar Abhiyaan" tenzükba sentong nung pai iba olen jemb.

Linük ajungalen health campaign ya Ministry of Health & Family Welfare-i inyaker aser September 17 nungi October 2, 2025 Gandhi Jayanti nung atemtsü ta CM Rio-i ashi.

Iba campaign ajanga tetsürtem, aiürtem aser tanurtem health & nutrition nung temulung agütsür. Iba campaign indang alizüngtem nung tashidak balala jelia putettsü, nüngdakba health services agütsütsü aser kibongtem dang healthy lifestyles benshitsü ajungmesotsü ta Dr. Rio-i ashi.

India kübok tesem balala nung iba campaign ya Health and Wellness Centres (HWCs), Primary Health Centres (PHCs), Community Health Centres (CHCs), aser District Hospitals (DHs) nung agir ta paisa shisem.

Nagaland nung iba campaign ya DHs 12, CHCs 26, Urban PHCs 8, HWC-PHCs 97, HWC-Sub Centers 336 aser AYUSH HWCs 49 nung agitsü ta paisa metetdaksü.

Hopta ana health camps agidang non-communicable diseases (including high blood pressure, diabetes, & cancer) screening, reproductive & child healthcare services (ANC, PNC, immunization, counseling, & anemia screening), nutrition & menstrual hygiene awareness, tuberculosis screening & referrals, aser mental health awareness o counseling alitsü.

"Asenok külemi anema aliba kibongtem aser Nagaland tashitaitba kümdaktsüdi" ta CM Dr. Rio-isa ashi.

Chief Minister-isa PM Modi nem tasoba anogo salem metetdaksü aser maneni pa lenisüba kübok len ania aotsü imlaba ashi.

PM Modi-i women's health tajungba kümdaktsütsü atema sentong renemba aser iba ajanga linük nung kibongtem aser loktitem tashi itdaksütsü merangba atema tenüngsang agütsür ta Rio-i ashi.

Ministry of Health & Family Welfare aser Ministry of Women & Child Development külemi yaritepa iba tongtipang campaign tenzüker ta Commissioner & Secretary of Health & Family Welfare, Anoop Khinchi-i ashi.

Tetsür aser tanurtem asüba nungi küzmüksü atema iba campaign ajanga preventive healthcare aser improved nutrition nung temulung agütsür aser Viksit Bharat 2047 kübok tashitait kibongtem adokdaksür ta Khinchi-isa ashi.

Tanü iba sentong nung shilem ka ama Chief Minister Rio-i District Hospital Dimapur aser District Hospital Mon nung Integrated Public Health Laboratory lapoktsü.

Paisa ambulances, hearse vans, aser Rapid Response Team vehicles sayatsü.

"Nagaland nung emergency services aser patient care tajungba inyaksü atema iba campaign kübok ambulances 26, hearse vans 12 aser Rapid Response Team vehicles 6 nguogo" ta Health & Family Welfare Minister P. Paiwang Konyak-i ashi.

Swasth Nari, Sashakt Parivar Abhiyaan aser National Health Mission kübok Nagaland nung "Basket of Free Health Services" agütsür.

Iba nung Preventive and Screening Services, Reproductive and Child Health Services, Specialized and Holistic Care aser Access and Support Services dena lir.

ENSF-i DoSE temepishiba magizüker

Dimapur, September 17, 2025 (TYO): Eastern Naga Students' Federation (ENSF)-i September 16, 2025 nü emergency Presidential senden ka ayonga amendang maneni lungkak aittsü lemtetogo.

Department of School Education (DoSE)-i ENSF dang lungkak aitba anentsü ayongzüka shidi ka züluba sülen iba senden amen.

September 15, 2025 nü Department-i Rationalization atema shidi züluba nung onoki akhangba onüktem indang kecha

shia mali aser iba jagi lungkak aitba shilem tanabuba agitsü lemtetogo ta ENSF-i metetdaksü.

ENSF-i September 18, 2025 nungi lungkak aitba shilem tasembuba tenzüksü. Iba osang ya ENSF Control Room ajanga yoktsü anungji federating units-i tetuyuba agütsüba ama pei pei tesem nung inyaksü metetdaksür ta ENSF-i ashi.

Sorkari onoki akhangba onüktem atema tenangzüka magütsü tashi onoki lungkak aitba manentsü ta ENSF-isa ashi.

NSF-i sorkar nem anogo 10 tsüngda mapa inyaksü züngzüksür NPCC aser ACAUT-i RMSA-2016 tesayurtem pusemer



RMSA-2016 Batch tesayur 367-i tanü agi anogo tibuba lungkakba noksa nung angur.

Kohima, September 17, 2025 (TYO): RMSA-2016 Batch tesayur 367-i tanü agi anogo tibuba lungkak aittsang Naga Students Federation (NSF)-i sorkar dang iba onük angatetteptsü atema anogo 10 züngzüksüogo.

Tanü NSF Emergency Presidential Council senden ka amenba sülen Chief Secretary dangi shidi ka züluba nung tesayurtemi mapa tajung inyakba atema tenüngsang agütsüba aser parnoki school education renlokda tsüba den Naga kaketshirtem anitetba indang shia lir.

"Sorkari anogo 10 tsüngda tesayurtem nem temeten agütsütsü atema mapa inyaksü züngzüksür. Sorkari mapa meinyakra tesayurtem temetentem küzmüka ayutsü atema ozüngi melaba ama mapa inyaka aotsü" ta NSF-i ashi.

"Tensa raksatsüsa sorkari administrative orders mesüra notifications kecha magütsütsü. Tesayurtem akhümtsübuttsü aser parnok khuretem magizükba ya temeten magütsüba lir aser Naga nungeri quality education aginüba den meputep" ta NSF-isa Chief Secretary dang ashi.

Külen, Nagaland Pradesh Congress Committee (NPCC)-ia iba onük atema süoki ia bilemba metetdaksüogo.

Sorkar aser tesayurtem tsüngda tekong merangtepba

ajanga kaketshirtem akoksar. Department of School Education aser State sorkari Gauhati High Court, Kohima Bench obandang mapa küma meinyakba ajanga lungkak aittsüsa aküm. Gauhati High Court-i obandang agütsüba ya Supreme Court-ia pusema nungiter, ta NPCC-isa ashi.

Okadaki tangar RMSA teachers ama RMSA-2016 Batch Teachers nem itasen aser service benefits kasa agütsütsü tetuyuba agütsüogo ta parnokisa metetdaksü.

Sorkari kaketshirtem asoshi bilemja memenui mapa inyaksüla. Tesayurtem aser Nagaland nung tarutsü kaketshirtem atema bilema okadaki tuyuba ama inyaksüla ta Congress-isa ashi.

Sorkar nungi telangzüba kecha maliba atema Bodbarnü tesayurtemi Chief Minister Neiphiu Rio dena minister aser advisor garitem süidang yimym ayim.

Tesayurtemi "Shame shame Nagaland government", "We want justice", "We will fight teachers' right", "Review petition - rest in peace", "Obey the court, respect the law" yimymtem ayima liasü.

Nagaland RMSA Teachers Association (NRMSATA)-2016 tesayurtemi September 15 nungi lungkak aitba shilem tanabuba tenzüka liasü. Parnoki August 25 nungi tenzüka pen down strike ama mezüngbuba lungkak aitba

shilem agia liasü.

May 20, 2022 nü High Court-i tesayurtem pusema obandang agütsüba Department of School Education-i agizükogo. Ajisüaka, sorkari iba onük atema review petition ka agüja lir anungji iba osang anguba sülen ang mapa inyaksü ta ashir. Department-isa tesayurtem dang pei pei school nung oa mapa inyaksü mepishio.

NRMSATA-2016 tesayurtemi sorkari mepishiba magizüker aser sorkari atsülangtsü meranger ta aitsür.

ACAUT-ia RMSA tesayurtem pusema metetdaksüogo aser state sorkar dang teti atema lemtet tajung ka agitsü shiogo.

2016 nungi sorkar tesayurtem contractual basis nung inyakdakja arur ajisüaka parnok tanü tashi regularize masü. Parnoki fixed salary dang angur aser iba ya labor laws anema lir. Sorkari parnok nübo agiadoker saka parnok nem tagütsütsü tim magütsür ta ACAUT-i ashi.

RMSA tesayurtem timtemba ola sorkari angashitsüla aser parnok nem temeten agütsütsüla. Item tesayurtemi küm aika sorkari par mapang nung inyaksü ta aremzüka ataogo. Ajisüaka küm aika atsülangba ajanga parnok jashir aser marezmükteter. Anungji sorkari memenui RMSA tesayurtemi akhangbatem agizüka mapa inyaksüla ta Media Cell, ACAUT-i sangdong ka nung ashi.

Tanü NPF Central Office Bearers senden amener

Kohima, September 17, 2025 (TYO): Brihostibarnü NPF Central Office Bearers (COB) senden amentsü aser idangji general convention atema anogo lemtettsü ta Naga People's Front (NPF) Secretary General Achumbemo Kikon-i ashi.

Kohima nung Swachhata Hi Seva tenzüka sentong nung osangbener den jembidang NPF-i NDPP den lokteptsü maparen tenzüka sülen general convention ayonga agitsü ta Kikon-i ashi.

September 6, 2025 nü Central

Executive Council (CEC) senden nung bangzüng tulu ka renem aser iba ya India sorkar aser Naga National Workers tsüngda mezüngbuba ceasefire agiba anogo liasü. Iba anogo ya putiotsü nung tongtipang anogo ka asütsü aser ibaji NPF tanishirtem tsüngda obang kati aruba atema lir ta Kikon-i ashi.

NPF-i iba bangzüng ya NDPP tanishirtem den lemsatop aser parnokia September 12, 2025 Central Executive Board (CEB) senden sülen telangzüba tajung agütsüogo. NDPP-i October 18,

2025 atema general convention ayongzükogo aser iba ajanga tajung ataloktsü imlar ta Kikon-isa metetdaksü.

Asüng NPF central office-bearers senden amendang party constitution nung aliba ama NPF general convention atema anogo aser tesem shimtettsü, ta paisa ashi.

Iba general convention nung NPF active members adentsü akok. Ajisüaka NDPP-i mezüng parnok convention amungtsüla aser iba sülen NPF amungtsü, ta Kikon-isa shisem.

Mokokchung nung Swasth Nari Sashakt Parivar Abhiyan tenzük



Dimapur, Rongjui/Sept. 17 (TYO): Linük aser state level nung Swasth Nari Sashakt Parivar Abhiyaan tenzükba sülen IMDH Mokokchung nunga September 17, 2025 nü iba sentong ya Deputy Commissioner, Mokokchung, Ajit Kumar Verma, IAS ajanga tenzükba liasü.

DC Mokokchung, Ajit Kumar Verma-i iba sentong nung o tatsüka jembidang, Swasth Nari Sashakt Parivar Abhiyaan ya India nung tetsür aser tanur atema health campaign tulutiba lir aser health system yanglushia tarutsü jenjang tajungba kuma yangertsü nükjidong nung lir, ta

ashi.

District nung Department of Health and Family Welfare aser Department of Social Welfare ajanga mapa tajung inyakba atema tenünsang agütsü aser iba campaign ya district nung departments balala lungjemer nüburtem tenzüksü maongka lir ta ashi.

Dept. of Minority Affairs ajanga applications meshir

Dimapur, Rongjui/Sept. 17 (TYO): Government of Nagaland kübok inyaka alirtem Directorate of Minority Affairs, Government of Nagaland nung deputation yimya nung küm asem tashi mesüra iba post nung shimtsü nübu temsüa mangu tashi Superintendent inyaka alitsü atema application meshir, ta Department of Minority Affairs ajanga sangdong ka nung metetdaksü.

Superintendent itasen ya Pay Level-13 nung alitsü.

Kasa jenjang nung mapa inyaka alir mesüra iba tsünglang Pay Level nung regular yimya nung küm asem tashi establishment mapa inyaka alirtemi iba post atema apply sütettsü.

Application agütsüadang candidate temi biodata/service details/parent Department nungi kuli tejangja agütsüba experience certificate aser

parent Department nungi NOC agütsütsüla.

Applications scrutiny asüba sülen temsüa aliba candidates tem shimer Selection Committee ajanga interview/personal interaction atema ajatsü.

Jangra aliba candidates temi applications ya Commissioner & Secretary, Minority Affairs address süa September 30, 2025 tashinung agütsütsüla, ta sangdong ka ajanga ashi.

Kohima nung state level Swachhata Hi Seva 2025 tenzükogo



State level Swachhata Hi Seva 2025 tenzükba sentong ka September 17, 2025 nü Old NST, Kohima nung agiogo.

Dimapur, Rongjui/Sept. 17 (TYO): State level Swachhata Hi Seva 2025 tenzükba sentong ka September 17, 2025 nü Old NST, Kohima nung agia MLA & Chairperson, NLA Committee on Environment & Climate Change, Achumbemo Kikon-i sentong semzükja liasü.

Kikon-i mürekmejutsü ya ajak mapa lir ta ashi aser waste segregation, environmental awareness, nisung temang müreka alitsü atema ajaki inyaktsü ayongzüka liasü.

Pai jana tai aser takok lemsatsü ya kanga tongtipang ta ashi aser jana agi rongsen kumdahtsütsü aser sorkar tenüng meseni pei sasa angateta inyaktsü ayongzüka liasü.

Kikon-i Kohima nung alir, shishilempar aser municipal council dang yimti müreka aser

tebour junga kumdahtsütsü asoshi teka amteper inyatsü ayongzüka aser Indore aser Switzerland medemdanga jembia liasü.

Swachhata Hi Seva 2025 ya Swachh Bharat Mission kübok linük tesem ajunga nung mürekmejuba campaign ka lir, kong mürekmejutsü atema nüburtem nem shilem agidaksütsü nükjidong lir.

Iba campaign ya Mahatma Gandhi asoba anogo, October 2 tashi alitsü, kong nüburtem, sorkar aser lokti tentet balala dang jana-rena bentetba, nüburtem amshiba tesem mürekba aser awareness agütsüba mapa inyaktsü ajungmesor.

Iba campaign yagi pei aliba tesem müreka ayutsü, jana nungi rongsen kumdahtsütsü

aser India lima müreka kumdahtsütsü nenshia ashir.

Sentong nung Chief Executive Officer, KMC, Zapuno Sophie menden liasü aser Mission Director, SBM-Urban 2.0, Kezhochole Rhetso ajanga iba sentong indang nükjidong rateta ashi.

Moko Koza-i temeja ken ka aten, kong Advisor, School Education & SCERT, Dr. Kekhrielhoulie Yhome; Advisor, Geology & Mining, DUDA, W Chingang Konyak; Superintendent of Police Kohima, Krodi Rhetso; KMC nungi councilor tem, sorkar ketdangsür, kaketshir, sanitation workers aser dangartem dena liasü.

Iba sülen lokti nübuttsük sentong ka agiba nunga parnoki shilem agia liasü.

Department of School Education ajanga metetdaksür

Dimapur, Rongjui/Sept. 17 (TYO): DEOs/Sr. SDEOs/ SDEOs ajanga agütsüba ama Professional Qualification of B.Ed. degree dener 28/06/2018 nungi 10/08/2023 tsüngta shimba Primary Teachers indang osang tejangja Department indang Online Educational Services Portal (<https://dosenl.in>) nung 'Downloads' Tab kübok agüja lir, ta Department of School Education sangdong ka ajanga metetdaksü.

Iba mapang shimba Primary

Teachers temi osang jangjashia indoktsü/aibelenba lira, temeden kuli kakat tem bener 23/09/2025 tashinung B Nellayappan, State Nodal Officer, NIOS Certificate Course in Primary Teacher Education, Room No. 411, Directorate of School Education, Nagaland, Kohima dangi tsüngtong arutsü mesüra <sno.nios.nagaland@gmail.com> on dangi email asütsüla, ta ashi.

Mapang süyiba sülen temelenshi kecha magizüksü, ta sangdong ajangasa ashi.

Nagaland Civil Secretariat Plaza nung Mega Health Camp agi



Nagaland Civil Secretariat Plaza, Kohima nung September 17, 2025 nü Mega Health Camp ka ayongzüka akaba nung Home Commissioner, Nagaland, Abhijit Sinha, IAS ajanga jembidang tangokba noksa nung angur.

Dimapur, Rongjui/Sept. 17 (TYO): Nagaland Civil Secretariat nung inyaker ketdangsür aser staff tem atema anogo ka Mega Health Camp sentong September 17, 2025 nü Nagaland Civil Secretariat Plaza, Kohima nung ayongzüka liasü.

Home Commissioner, Nagaland, Abhijit Sinha, IAS ajanga iba sentong nung jembidang, health camp ka ayongzüksü asoshi Tikvah Healthcare Private Limited, Dimapur ajanga Nagaland Civil Secretariat dang asüngdangba mapang parnoki pela agizük, kechiaser iba ama health camp yagi Nagaland Civil Secretariat nung officers aser staff tem kanga ajangzüksü, shirnok pei temang asoshi meblemi office mapa nung temulung agüja inyaker ta angatet, ta ashi.

Nisung ajak atema anema aliba ya rongsen tongtipangtiba lir, aser nisung ka meshirang tashi anema aliba jenjang memeteter, ta ashi.

Mapang shidak nung temang tendangba ya tongtipang kumogo, kechiaser asen temangi khen-khenbo asen temang nung tashidak bendenba indang mesayur, anungji nisung ajaki iba ama health camp nung dena teti temang tendangtsüla, ta Home Commissioner, Abhijit Sinha-i ayongzüka.

Pai Tikvaha Healthcare Private Limited dang pelaba lemsatet, shirnoki Amrita Hospital den lungjemer mega health camp ya ayongzüka, aser Nagaland Civil Secretariat nung inyaker ajunga dang pei kishizüng tonga aruba health camp nung shilem agitsü

ajungshia liasü.

Asen temang nung timtem ka majuru tashi zübazülema alir, saka asenok tain akumba ama aser anisüngzüka makai mapa inyakba ajanga asenok mozü kidangi mao tashi timtem memeteter, ta Abhijit Sinha, IAS-isa ashi.

Iba sentong nung Ram Ganapathi, Chief Marketing Officer, Amrita Hospital, Faridabad aser Benthungo Kithan, Director, Tikvah Healthcare Private Limited natia o tatsütsü jembia. Iba sentong nung Dr. Thungbemo Edwim Humtsoe, Tikvah Healthcare Private Limited menden liasü.

Tikvah Healthcare Private Limited ajanga Amrita Hospital, Faridabad den lungjemer ayongzüka camp nungya preventive health screening aser superspeciality consultations den Complete Camp infrastructure aser Patient Management Services, USG, ECG, 2D Echocardiography, FibroScan, Bone Mineral Density (BMD) Testing, Biothesiometry, ICTC van for viral marker screening aser Routine Blood investigations amala teyari agüja liasü.

Iba Mega Health Camp ya Tikvah Healthcare Private Limited nungi Dr. Thungbemo Edwim Humtseo-i anir Tikvaha Healthcare Private Limited, Amrita Hospital, Faridabad, Dr. Lal Pathlab-ENR Health, Fourrts (India) Laboratories Pvt. Limited, Chennai aser District Hospital Dimapur nungi doctor trok aser mongin temi ketdangsüa liasü.



September 17, 2025 nü Madhya Pradesh kübok Dhar district nung PM Mitra Park atema lung azüngtsütsü asoshi Ato kilonser, Narendra Modi arudang tangokba noksa nung angur.

PM Modi küm 75 ajungba anogomong nung lenirtemi salem lemsatep

New Delhi, September 17 (Agencies): Bodhbarnü Ato kilonser, Narendra Modi arrshi küm 75 ajungba anogomong nung lenirtem aikati pa den tepela salem osang lemsatep. Russian Ambassador Denis Alipov, US Tir Donald Trump, New Zealand Ato kilonser Christopher Luxon, India Tir Droupadi Murmu aser External Affairs Minister S Jaishankar nunger densema lenirtem aikati pa den tasoba anogomong salem lemsatep. Russian Ambassador to India, Denis Alipov-i X ajanga, "India Ato kiloner @narendramodi den tasoba anogomong tepela salem lemsateper! Akhidang nungi India aser Russia na tsüngda tesendaktep lir aser tesendaktep tajungba akümtsüsa pai shilem agia inyakba atema pa dang pelar. Linük aser alima atema pai inyakba maparen ajak nung takok ngudakjang ta

sarasademsür," ta lemsatep. US Tir, Donald Trump-ibo indangindanga Ato kilonser Modi dangi phone süa tasoba anogomong salem lemsatepa liasü. Tesülen Trump-i Truth Social ajanga, "Tang tuang kü medemer Ato kilonser Narendra Modi dangi call süa jembiogo. Ni pa den tasoba anogomong tepela salem lemsatepogo. Pai mapa tajung inyakdar. Narendra: Russia aser Ukraine na tsüngda rara anentsü atema nai nungita inyakba atema pelar! Tir DJT," ta metetdaksü. New Zealand Ato kilonser, Christopher Luxon-ia X ajanga, "Namaskar, kü medemer tajung Ato kilonser Modi. Na arrshi küm 75 ajungba anogomong nung ni aser New Zealand nung medemer ajaki nü nem tenüngsang agütsür. Iba ama alizüing tongtetba mapang ya nü dak aliba lenisüba shisatsü

asadangtsü mapang ka; 2047 küm tashi nungbo India ya terenlok linük ka akümtsü atema nai India leniba asadangtsü mapang ka," ta metetdaksü. Tir Droupadi Murmu-ia X ajanga, "India Ato kilonser @narendramodi asoba anogomong nung pa den tepela salem lemsateper. Nü lenisüba kübok nai meranga inyakba ajanga linüki alizüing tulu aika koktettsü atema nai sobaliba ka tenzüksüogo," ta metetdaksü. External Affairs Minister S Jaishankar-i, "Ato kilonser @narendramodi asoba anogomong nung linüki tasoba anogomong salem lemsatepba nung adener. Pa lenisüba nung Atmanirbhar, Sammriddh aser #ViksitBharat yangertsü atema melungteter inyakba ajanga ajungmesor. Pa temang anema alitsü aser linük tenzüksü atema pa nem ano küm aika arrshi moajang ta sarasademsür," ta metetdaksü.

Karnataka nung SBI Bank ka nungi sen crore 20 jenjang hon auya

Karnataka, September 17 (Agencies): Karnataka kübok Vijayapuri district nung aliba State Bank of India (SBI) Chadchan branch nungi nisung aseme sen crore 20 jenjang hon den sen crore 1 auyaogo, ta Bodhbarnü police-i metetdaksü. Nisung asem tejak nembanger pistol aser kotari bener bank-i atuba sülen auya. Mongolbar aonung 6:30 ako meta nisung asemji current account ka lapoktsü ama sayua

bank telung jagi atu. Iba sülen parnoki pistol amshia bank manager, cashier aser tanga staff tem amokmerena tetsüngteben ajak lisü agi alen. Iba sülen parnoki sen aser hon auyar ao. First Information Report (FIR) nung shia aliba agi, auertem jagi sen crore 20 jenjang hon seret 20 aser sen crore 1 auyar ajen. Bodhbarnü Vijayapura Superintendent of Police,

Laxman Nimbargi-i, "Auertem jagi Suzuki EVA gari ka amshi aser gari number plate taila amshiba mezüing bushisüngdang ajanga jangjaogo. Bank nungi auyaba sülen parnoki kidanger state Maharashtra kübok Pandharpur tsütsüleni jena ao," ta metetdaksü. Bank manager-i kuli agütsüba nung ajemdaker ken o ka benokogo aser auertem aputsü atema special police teams tentetogo.



September 17, 2025 nü BJP MP, Anurag Thakur-i Himachal Pradesh nung Dharampur Assembly constituency semdanga tzümetsüing ajanga teraksatsüba asadangba mapang tangokba noksa nung angur.

Anti-conversion ozüing atema SC-i state tem dang telangzüba meshir

New Delhi, Rongjui/September 17 (Agencies): India kübok state aika nung anti-conversion ozüing benoka lir; item ozüing nokdangtsü atema temepishiba ken o angadangba mapang nung Supreme Court-i state tem dang iba dak sendakba nung telangzüba agüjang, ta tuyuogo. Chief Justice B R Gavai aser Justice K Vinod Chandran nati akümba bench-i, state tem dang nungi kodang telangzüba ngudir item ozüing nokdanga atatsü atema parnoki shisadangtsü, ta metetdaksüogo. Anti-conversion ozüingtem anema benokba ken o angadangba mapang nung bench-i temepishiba ken o benokertem atema jembitsür senior advocate C.U. Singh dang, tawa Uttar Pradesh ama state tem nung iba ozüing ano tesashiba yangluba dak sendakba nung temepishiba ken o tasen benokshitsü akok, ta shiogo. Tamangba yimsü meyipba nokdangtsü atema Uttar Pradesh, Madhya Pradesh,

Himachal Pradesh, Uttarakhand, Chhattisgarh, Gujarat, Haryana, Jharkhand, Rajasthan aser Karnataka densema state 12 nung anti conversion ozüing benoka lir. Ken o angadangba mapang nung Singh-i, yimsü balala amangertem tsüngda kiyimba ken otem nung tai tonglokja alirtem nem bail magütsüsüa akok, ta metetdaksü. Singh-isa, Uttar Pradesh nung anti conversion ozüing tasenba kübok ken o benoktsü atema third parties nem-a temelaba agütsüba ya tebilemstü onük ka lir; iba ya ajanga yimsü balala amanger apuanitem amokmerener aser yimsü dak sendakba sentongtem nung loktii timtem agütsüba kanga bulua akümer, ta metetdaksü. Sorkar atema ken o jembitsür Additional Solicitor General, K M Natraj-i, "Küm asem-pezü sülen ajungbena item ozüing nokdangtsü atema parnoki benoker. Onoki telangzüba agütsütsü," ta metetdakja liasü.



New Delhi, September 17, 2025: Mapa manguba tebilemstü anema Bodhbarnü New Delhi nung Indian Youth Congress-i Centre nung BJP sorkar anema longkak aitba noksa nung angur.

Maharashtra nung Ladki Bahin scheme magientsü: Fadnavis

Chhatrapati Sambhajinagar, September 17 (Agencies): Maharashtra state sorkari 'Ladki Bahin' scheme ya magientsü, aser 'Lakhpati Didis' crore ka adokdaksütsü atema sorkari inyaktü, ta Bodhbarnü Chief Minister, Devendra Fadnavis-i metetdaksü. Sorkarisa yimtsüngtem nung Credit societies tenzüksüba ajanga tetsürtem nem mapa maongka agütsütsü, ta paisa metetdaksü. Bodhbarnü Chhatrapati Sambhajinagar kübok Kingaon nungi state tesem ajaklen 'Mukhyamantri Samruddha Panchayat Raj Abhiyan' campaign tenzüksüba sentong nung jembidang pai item o ya metetdakja liasü. Iba campaign nükjidong ya central aser state schemes ajanga yimtsüng ajak tajangzük ngudaktsütsü atema lir. "State register nung yimtsüngtem mezüngokra Maharashtra azükaru masütsü; state azükarutsü atema sensakertem, aayangertem aser yimtsüngtem tama azükarutsü," ta Chief Minister-isa metetdaksü.

CM-i, 'Mukhyamantri Ladki Bahin Yojana' scheme kübok temsüa aliba tetsürtemi ita shia sen 1,500 teyari angur; iba scheme ya manentsü, ta ashi. "Ladki Bahin scheme ya anenadoktsü, ta kari jembir. Asen aianutemi ibaji mamangtsüla. Tetsürtem nem sen 1500 agütsüba ya manentsü. Onoki yimtsüngtem nungi tetsürtemi aniba credit societies tenzüksür, aser ibaji ajanga tetsürtemi mapa maongka angutsü," ta pai ashi. Tetsürtem dang nungi sen tetemlok magii sen lakh 1 tashi aputsür, aser iba ya 'Lakhpati Didis' crore 1 adokdaksütstsü atema lir; küm ka nung sen lakh 1 tashi aazüker tetsürtem dang 'Lakhpati Didis' ajar, ta pai metetdaksü. Iba campaign kübok Dalit nungertem aser Adivasi nungertem atema-a scheme tenzüksütsü, ta paisa shisem. Kasa sentong nung state minister Sanjay Shirsat-i sorkar dang Marathwada region nung anendaka aliba project tenzüksü atema mepishi. Iba region kübok district 8 lir.



TIR YIMYIM YIMOBILEM (EDITORIAL)

DIMAPUR THURSDAY, SEPTEMBER (RONGJUI) 18, 2025

Asenoki yangluba tebilemstsü !

Tangarbo alima nung nisunger tebilemstsü akoktsü asoshi amuia mao inyaker aser lenmang (solution) tasen nguteta nisungtem tebilemstsü koktsür. Aji oda, anogosa anogo tetsüng agidang jajaya aliba khen nung mapang magii aser mebelemi tatongtsü ka atongtsüsa tangaribo gari aser tayimtsü purapiteta yanglutsü. Kasaji, nisungtem merila agi metepba ajanga ramen tashidak agi tesümar amai süa alidang mozü nguteta ramen tashidak nokdangba ajanga alima nung meimchir taküm aika kümzükogo. Iba kasaji tashidak ka adokli iba tebilemstsüji mozü tasen ka ngutetba agi kokli ta anosa cancer tashidaka akoktsü asoshi tangarbo mapang shitak nunga chia mechiyong aser memejang inyakdar asütsü. Aji oda, nisungtem mapa maka timtemba ngur, nisung aikati mapa tapu meyina adokdakja inyakdaksüba agi alima nung kibong aika mesüdag. Ajisüaka, asenok Nagaland nungbo asenoki tebilemstsü akoktsü meranger masü saka tebilemstsü adokdaksütsü meranger amato tuluba nungi shir tilabatiba tashi agi mapa shitak meinyaker. Aji oda, asenok yabo tangari soruchioka yutsüba chiyonger anogo meina kazürtemang mesüka lir. Iba jagi tangari asenok nem teyari agütsüba agi asenokibo temoatsü kuma amshir masü saka tebilemstsüang kümdaktsür. Item ama asenoki asenoksasa yangluba tebilemstsütem rongnung tang Kohima nung RMSA sentong kübok 2016 küm shimer tesayurtemi parnok nem ita sen shitak agüjang aser mapa nung regular kümjang ta anogo ti dak tali süia longkak aita amongba ya ka asütsü. Shitakba agibo tesayurtem ya tang aser tarutsü mapang tebilemstsü akoktsü asoshi tanurtem dang shisalen sayutsü asoshi shimba purtem lir, anungji parnok agi tebilemstsü makümtsüsa government-i mapang shitak nung kechi teinyaktsü ali, itemji inyakadoktsüla. Aji oda, parnok ya khen atema shim asünungbo khenji koba anogo nung temadoker, iba kasa anogo nungji tangutsü tim agütsür anendaktsütsüla saka mapa nungi manendaktsüi inyakdaksür ser nung ita sen dena ajemtsü aser regular-a mesütsü ta süra, ibajibo mezüngmeshiba mapa ka dang asütsü. Ibayongji, okadak obendangertemia tesayurtem metentsü südi. Ibaji angateta government nung alirtemia tesayurtem metentsüa obendang agütsüba anema temaba okadak ken o mebenoki tesayurtem denji tajung ka jembia telemtetba ka agi tajungba asütsü. Shiba südir sang, okadak ken o benoka jembibaji angati masü, yangji nübo aser rongsen endoker, anungji okadak ken o benoka yur iba atemaji senotsü endoktsü agibo state government-a iba kasa sen jagi tesayurtem tangutsü aliba sen danga agütsütet nungbo koda jungla ta bilemer. Aji oda, tesayurtem taginüba mataloktsüba agi Kohima nung parnok longkak ait manener aser ano külen Nagaland anüdoklena Eastern Naga Sttudents' Federation purtemia state government-i school-tem nung tesayur shitak meyokba agi longkak aita takangba agütsüaka tenaronga marepzüba agi, joko tanü nungibo Nagaland anüdoklen tesem ajak nung government office aser school kata melapokdaksütsü ozüng agüja lir. Atangji, iba jagi nübortemsa akoksatsü, ajisüaka asenokbo asenoksasa tebilemstsü bena longkak maitra government-ibo nübortem lenmang nung, mozü kidang aser school nung timtem takoksa ajurubaji mangu amai dang toktsütsü. Government shitak aliba lima ka nung mapa inyaktertem office-i maruba atema lanurtem longkak aittsü menügdaktsü, kasaji government school nung tesayur maliba aser tesayurtem ita sen shitak manguba tebilemstsü malitsü, iba amaji government-i anepaluba gari lenmang onsara majung akümba agi nübortem longkak aittsü nüngdak madoktsü. Ajisüaka, asen lima nungbo tanga tebilemstsü masü saka asenoki asenoksasa yangluba tebilemstsütem agi asenok kangshir, anungji koba government südirsüaka, tang nungi danga government-ibo tebilemstsü masü tebilemstsü akoktsüba lenmangang yanglutsüla.

OLEMSABANG

Asen lima tarutsü nükla aser teinyaktsü

~ Lanuchuba, Signal Angami, Dimapur

Aya asen lima yamai dang aotsü no?, Arung khen shisadangdi tarutsü election nükla aser asen lima melenshitsü. Asen lima tarutsü nükla, asangsang aser pungmang amai, aji saka inyak nungbo Koda asen lima tobur tajung asütsü, Kü tebilemba aser nükla nung ajemdaker, yamai asenok nüburi election yimya aser aroki teyaritep nung inyaka ao nung ajungtsü amai iba sabang nung lemsar. Yangi Otsü den yarisüma, Temeshi Lai tekong balala ajanga asen nüburtem temoatsü südakjangma, tamasa asenok asoshi, Temeshi Lai tekong kar lemsar.

(Apijemtsü Shin 27-24. Kechiyong rongsen teti asoshi masü, aser chuba korang jagi teti asoshi amongtemdi ma?). Tanü putu yimya amai dang asenok nüburtemi election aru dang sen meshiba, agiba yimya intokti arungma. Iba yimya memelenshira asüng tarutsü asen nübur tia ayatai ajurutar aser tamajungba ajurutsü ya asenok nüburi mapayur no?. Ano asen yimti ka Khen ka Khen ta ajema nütsüng kümatar, ya asenoki aroka bilema asen yimti aser yimtsüng, town aser compound atema joko taliri aser asen nütsüng nüburi jaka balala nung liaka asenoki meyaritep nungbo shirnoki yaritsü. Joko asen alidak tarutsü asoshi kecha melira constituency-a ajemtsü, nütsüngyongzüka ajemtsü aser samatsü ana nung lir. Tebelemba shisa O khar yamai ayongzüker.

1. Akok nungbo sen alir takari election nung crores menden intoka tokteper, karbo atoker, ano karbo matoker taji, iba dang nungibo pa or lai Projects balala inyak nung Koda?.
2. Takari toktepnera asenokbo election mapang sen alemba yimya aser shirnoki tokteper pa mesüra lai malemstsüla aser candidatepuri sen magütsütsü lemtet nungbo election mapang nung timmatemtsü aser nüburi angateta asen yimti aser nübur ajungtsü ana nung lir.(sayutsüngir 7-28. Ajiang, ni ya dang angu, oda Tsüngremi meimchir tindang yanglu saka parnoki aika puratetogo.)
3. Asen yimti aser yimtsüng, town aser compound ya election mapang nung sen mendoki inyakra, Tsüngremi asenok telongjem nung saklokba ama renloktsü aser tajungba akümtsü.
4. Saka iba amshiyim-ya yamai inyak nung jongtisüng na?. Tarutsü nung village, town aser compound nungi telemtet takang agia teti telidak aser bendanglen alir longjemmer lemtet inyakyim agi nung dang ajongtsü, aji ozüng takang tajung asütsüla, hao democracy ji yamaji masü ta meshili, saka joko election yimya tamajung nungi indokti. Ibaya asenoki minyak shirnoki arua inyaktsütsü, anungji ka Küma longjemshidi joko meimtsü mapang tongja tongoko.
5. Aser sen-akhari tetenzü takar rongsen akhar atemabo kokra election nung metoktepi, na akhabajaki mozü ki tajung ka lapok nung ajisa tajungba aser tanü asüngbo machine tabu balala ayika adoka lir, ibaji na aser asen nübur atema rongsen anguba nükla aji asütsü.
6. Tanü putu ten apet company ayika lirko ano aluyimba nungsa machine tapu balala ano institution dak jakzükba skills development projects aser shopping mall lapoktetsü lenmang ayika lirko.
7. Tanü asen naga nungera Doctor specialist mozü metetter tajung atoker, anungji nai mozü ki koyi lapoktet, yamaji tanü putu nungbo shiranger tem atema tajung aser lapoker atema koyi lapoktetter, payikajisa tajungba aser asen temang atema kanga tongtipang kümoko, yamala mesük inyaktsü jenti lir.
8. Nisung ajaki joko election sen meimba nung ojang südi arung, asenoki asen jaka nung sen crores menden intokdang asen yimti tia angorsüdi?, ya asen nübur ajaki angatettsü mapang tongoko.
9. Joko asenok nisung shia yamai südi ta asen nüburi shidi aser asenok development aser employment atema projects tem lemtetter yamai- ang inyakdi ta lemtet mapang ashitsü tongoko.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

All India Congress on Church in Mission senden tenzükogo



September 15, 2025 nü Nagpur (Maharashtra) nung aliba Hotel Tuli International nung ayongzükba All India Congress on Church in Mission (AICOCIM) nung Evangelical Fellowship of India (EFI) General Secretary, Rev. Vijayesh Lal-i okila jembidang tangokba noksa nung angur.

Nagpur, Rongjui/September 17, 2025 (Agencies):

September 15, 2025 nü Maharashtra kübok Nagpur yimti nung All India Congress on Church in Mission (AICOCIM) senden tenzükogo, aser iba sentong nung Evangelical Fellowship of India (EFI) General Secretary, Vijayesh Lal-i okila jembia liasü. Nagpur nung aliba Hotel Tuli International nung ayongzükba sentong nungji India tesem balala nungi Khristan lenir 450 shi aden.

Okila jembidang Lal-i, "Iba ya maongka mapang ka lir; tatok meshitsü, jangjashitsü aser asentenshir tashi angatsü mapang ka lir," ta ashi.

Anogo pezünü senden ya tesüiba küm 15 tsüngda tang mezüng ayongzuka agir. Iba senden nung Khristan denomination balala nungi lenirtem, laishirtem, shisashirtem aser ministry balala nung inyakertemi mission mapa, nütsüngsüba, ochi temeden, shisaliok, lenisüba nung tetsürtem aser India nung aliba Arogotem nung tongtibang onüktem benoka jembi tenzükogo, ta International Christian Concern (ICC)-i metetdaksü.

Lal-isa, asenok atema tayongzükba tulutibaji temalen nungi masü saka telunglen tashimait ajanga lir, ta metetdaksü.

Paisa, Khrista osangtajung prokba aser nütsüng kümdaksüba na tsüngda ongdang tulu adoka lir, anungji Laishiba aser sarasadem nung ajemdaker tanela asentenshitsü nüngdak, ta ashi.

Lal-i, "Lokti adenshitsü akok, saka yipru mapang nung nütsüngtem dang nokdaksü," ta ashi. Paisa, loktiliba indang süngyanglutemji rongsen, konang aser tashi arishiba lir, saka Khrista nütsüng kati takoksa aremtsüsa tamang ajanga tamangertem anitetsüla, ta ashi.

Lal-isa, denomination tsüngda toktepba, kin aser region sasep nung inyaktepba ajanga telemsa tulu adokdaksüogo, ajisüaka Lai tesayuba nung ajemdaker item tesükdaksüji melidaksütsüla,

ta metetdaksü.

Paisa lenirtem dang ajemalutsü, tatok meshitsü aser Arogo ya Kibuba meyong aser mission wadangji ka dang ta sayutsüla, ta ashi.

Mission omen nung jembidang Lal-i Arogotem dang sentongtem ayongzükba agiba den külemi longjemer sayutsüngitsü, nütsüngsüba mapa inyaktsü, timtemertem anepalutsü aser tim masüba mapatem anema inyaktsü ayongzük.

"EFI teinyaktsü shilemji ambangyima inyaktsü atema masü saka tenzüksü atema lir. Iba fellowship ya tangartem indaktsütsü atema inyakba aluyimer ka ama lir," ta pai ashi.

Paisa lenirtem dang Khristai tenzükba ama tenzüksü ayongzük.

O tembanga Lal-i tan putu nung Arogo teinyaktsü asem lemsatep, aser teinyaktsü asemji, bendanga agütsütsü, tasü aittsü aser imdangjema inyaktsü lir.

Bendanga agütsüba tetezü Khrista atema Arogo yangertsü asoshi bendanga agütsüba, tasü aitba tetezü timtem-tekanngshi liaka tamang jenjang manokshii nokdakba aser imdangjema inyakba tetezü melenshia dang aliba loktiliba ka nung tanela nem anidakja maongka bushia inyakba lir.

Paisa lokti dang, AICOCIM senden ya tatembang mesüdaksütsüla saka asentenshir kulisüba mapa inyaktsü atema tetenzüker südaksütsüla, ta ayongzük.

"Iba ya senden ka masü saka tamang agi metsühjang aremba lir. Alu jenti aruhtsü atema Tsüngrem dak tamang akatsüla," ta pai ashi.

"Alimai maru aliba lanurtemi tesüba mapangtem meyipa reprangdang, tan putu nung Arogoi tetsübu masü saka tamang shim, sademsadema aliba masü tashi angaba shim aser ajak dang temabaji Khrista südaksü, ta reprangtetsüsa asenoki inyaktsüla," ta paisa ayongzük.

ANOGO ABEN TSÜNGREM DEN

Asenoki Sarasademer

Simon, Satani na tsüksü ama septoktsü mepitet.

Saka Ni na asoshi sarasademtsüogo.

Luk 22: 31-32.

T. Ken 50: 15 nung Tsüngremi ashir, "Aser timtemba anogo nung Kü dang jaang, Ni na kümzüksü aser nai Ni sentsüwangshitsü". Yangi Tsüngremi asenok dang sarasademtsü ashir. Pai asenok dang angashitsü nangzük. Pa teyari metetang ta Pai asenok dang ashir. Ibai asenoki kodang Pa nem tenüngsang aser tetushi agütsüdir idangji ataloker ta metetdi.

Kibubai sayuba sarasadem nung "Obala" jagi anogoshia asenoki pei asoshi aser tangar asoshi sarasademtsütsü bilemtetdaksür. Shitakba nung asenoki nisung ajak asoshi sarasademtsütsüla, tajungpur atema dang masü saka nüngdakbapur ajak asoshi, tashi maiter aser tashi aiter, aser ajemrepa alirtem asoshi.

Tanü Lai nungi Yisui Pa nütsüng Peter shiba tamang nung seplasepshia liasü, pa asoshi sarasademtsü. Asenokia tanela nung, tamang nung aser jakla nung tashi maitertem asoshi sarasademtsütsüla. Khrista ajanga Tsüngrem den tesendaktep shitak yur maneni sarasademba jagi mapa inyaker. Khristantemji tagutsürtem lir. Asenoki azü tokshir; rakzükraktermer, temulung makai alirtem, mapa makai alirtem, aser ibala mesükba ajak asoshi temeim agi sarasademtsütsüla.

Iraq nunger Khristan kati 'livestream' tesüdak mapang tepset



September 17, 2025: September 10, 2025 nü France kübok Lyon nungi Iraq nunger Khristan kati TikTok nung pa tamang indang 'livestream' tesüdak mapang nung nisung kati kotari agi pa tsüngset, ta osang ka ajanga metetdaksü.

Assyrian Khristan arrshi küm 45, Ashur Sarnaya-i pa senzütsü atema wheelchair amshia liasü. Iraq nung Islamic State (IS) kirlongrartem matsüngdang nungi pai France-i jena ao. Mapang shia online ajanga mesüra phone ajanga pa amokmerena liasü.

September 10 aonung

10:30 ako meta par kima pai TikTok ajanga pa tamang indang livestream asüba mapang nung nisung kati kotari amshia pa tekong nung tsüngoktsü, ta tenük kuli alirtemi metetdaksü.

Mejangjaba nisung jagi tekong-zü rangdangtsüba sülen jena oadok. Iba osang angashia emergency services arua pa kümzüksü merang saka süadok.

"Brihostibarnep online nung video clip ka prokshi aser iba video nungji Saryana tenitebang ajak nungi azü alua sayur," ta osang ka ajanga

metetdaksü.

Kasa video nungji pa amaksangji süoshi tanak den korang semer liasü.

Police ketdangser kati, "Iba ya ozüng alema inyakba asü, yimtenren tsütsülen nungi asü, tamangba yimsü tsütsülen nungi asü temesepba mozü tsütsülen nungiar tang tashi nungbo mejangjar. Saryana ya social media kanga amshir ka liasü. Onoki iba tsütsülen nungia bushisüngdanger," ta metetdaksü.

2014 küm Iraq nung Islamic State kiralongrartem kanga merenba mapang nung pai Iraq toktür ajen aser France nung par aianu ka den külemi liasü.

Pai mapang shia Arabic oshi nung online ajanga Khrista osangtajung lemsatepa liasü, ta Observatory on Intolerance & Discrimination Against Christians in Europe (OIDAC Europe)-i metetdaksü.

Tamalen Sarnaya-i, Muslim nungertemi mapang shia social media ajanga pa amokmerener, ta metetdakja liasü.

OIDAC Europe-i, "Europe nung Khristan organization aikati iba tatalokba aitsüogo aser Middle East nung Khristantem sademsadema pei yimsü benshitetsü aser taküm akümketa litettsüsa inyaktsüla," ta metetdaksü.

Sarnaya-i Arabic oshi nung social media ajanga pa taküm kuli lemsatepa aruogo. Taküm

March ita nunga Muslim nunger kari pa dak züka liasü.

Muslim nungertemi ashishiba nung ajemdaker pa social media nung lemsatepba post/video karbo nokdanga liasü.

Assyrian-Chaldean Association of Lyon Tir, Georges Shamoun Ishaqi,?"Sarnaya ya temeim aketba nisung ka liasü. Tamangtir ka aser Khristan tamang indang jembitsü jangraba tamanger ka liasü," ta metetdaksü.

Sarnaya tepsetba ken o ya Organized and Specialized Crime Division (DCOS)-i bushisüngdang tenzükogo.

OIDAC Europe-i, Sarnaya tepsetba ya France nung Khristantem anema inyakba tatishitsü aika rongnung ka lir; 2025 küm tenzükba sülen June ita tashi nung France nung Khristantem anema inyakba shilem 13 agi teimba kümogo, ta metetdaksü.

"OIDAC Europe-i international organizations dang Europe nung Khristantem, talisa Khristan yimsü dang meyipertem anema inyakba tebilemtsü lemsatepa arur aser sorkar dang Europe nung tamangertem ajak kümzüka alitsü atema inyaktsüla ta takhangba agüja arur. Iba ya yimtenren onük ka masü saka meimchir temeden onük ka lir," ta OIDAC Europe-i metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Teyi**

(n) tangar ka indang oyala (sister in third person)

* Nüngsangba teyi tantsüla mapa inyaker.

Teyin

(n) ak chanu tetsü (young female pig)

* Ozü ka chanu ter rongnung teyin tenet lir.

OLONG PAITEP # 7274

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S___i
9. Nisung rongnung telemsa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7273 TELANGZÜBA**TIPIEN :**

1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

LANGTSÜNGLEN :

2. Anga, 3. Yabang, 4. Tarok,
5. Orak, 8. Ainer, 9. Anema,
10. Jabili, 11. Among,
12. Miim, 13. Anem.

NAI-A YA METETTER



RAKTDAN AMRIT MAHOTSAV 2.0

17th September
10:00 am - 5:00 PM

AKHIL BHARTIYA TERAPANTH YUVAK PARISHAD**TERAPANTH YUVAK PARISHAD SURAT**

September 17, 2025 nü Prime Minister Narendra Modi tasoba anogomung nüngtem nung Akhil Bhartiya Terapanth Yuvak Parishad (ABTYP)-i azü unit 3 bendentsü alizüng yur campaign ka ayonga agiogo.

Iba campaign dang Raktdan Amrit Mahotsav 2.0 ta ajar aser India nung dang masü saka Nepal, US, UK, Indonesia, Australia, Dubai aser Africa linük balala dena linük 70 nung iba camp ayonga agiogo.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimyim bureau tem nung agüjang.

Manipur nung telungpur aika apu; prangpong-injangtem ngutet**Imphal, September 17, 2025**

(Agencies): Manipur Police aser security forces-i KCP (PWG), UNLF (Koireng), aser PLA züngsem aika puogo.

Manipur kübok tesem balala nung mita aodang prangpong-injang aika den taitüsü aketba kulikakettem angu.

Kangleipak Communist Party (People's War Group) züngsem aseme bank ketdangsürtem amokmerenba atema apu.

Parnok ya Imphal East kübok Khabam Lamkhai Bazar aser Hatta Kangjeibung tesemtem

nung apu.

Parnok ket nung mobile phones, Aadhaar cards, KCP (PWG) letterheads, bank-targeted envelopes, organizational seals aser sen ngutetogo. Iba ajanga tashiyim agi sen sarua aruba kulitem ngutetogo.

Sepaitemisa Thoubal district kbok District Hospital Khangabok anasa United National Liberation Front (UNLF-Koireng faction) züngsem ana apu.

Tena ket nungi Mahindra

Bolero, Aadhaar card, mobile phones, SIM cards, ATM card, aser vehicle documents ngutetogo.

Ano, Bishnupur district nunga People's Liberation Army (PLA) züngsem ana apu.

Külen Thoubal district kübok Lilong Bazar nungi KCP (PWG) züngsem ana apu. Tena dang asüngdangya asüba sülen tesem kati aodang 01 M16 rifle, 04 INSAS rifles, 04 SLR rifles, 02 .303 rifles, 382 rounds of assorted ammunition aser 26 magazines ngutetogo.

BTC elections nung BJP-i BPF aser UPPL den longjemtsü

Guwahati, September 17, 2025 (Agencies): September 22, 2025 nü Bodoland Territorial Council (BTC) elections nung BJP dena party ajaki kanga meranga tokteptsü ta Assam Chief Minister Himanta Biswa Sarma-i ashi.

"BTC nung BJP-i sorkar akümtsüsa menden mangutsü. Ajisüaka BJP-i BTC region ajungtsü atema BPF nungi Hagrama Mohilary aser UPPL nungi Pramod Boro na den longjemtsü mulunga lir" CM Sarma-i ashi.

"NDA teloktep nung BPF aser UPPL dena lir. Hagrama Mohilary ya UPPL ama NDA

nung shilem ka lir anungji election agiba sülen ajak den amalitepa sorkar ka akümtsü" ta paisa ashi.

BJP-i single largest party akümtsü aser menden teimba angutsü saka BTAD ya Dispur dang nungi balaka lir anungji shisadanger inyaka aotsü ta Sarma-isa shisem.

Tanü Bodoland People's Front (BPF) president Hagrama Mohilary-ia Chirang district nung nüboyima senzüdang Kajalgaon constituency BPF candidate Pani Ram Brahma pusemba metetdaksüogo.

Mohilary-i United People's

Party Liberal (UPPL) aser parnok lennirtem anema jembi. Pai UPPL candidate Chandan Brahma dang election nung metokteptsü ashi.

UPPL working president, Rwngrwa Narzary-ia Chandan Brahma nem vote meinoktsütsü a Mohilary-i ashi.

Khampa Borgoyari-i tim masüba politics inyaker anungji pa election nung tamakok angutsü ta Mohilary-isa ashi.

"UPPL president aser BTC tanishir Pramod Boro-i taoba sorkar akümdang ni mejaok. Iba ajanga UPPL tekong merangba aser politics yimya memetetba sayur" ta paisa ashi.

Mezüngbuba Mizoram railway line nung Rajdhani Express senzür

Aizawl, September 17 (Agencies): Prime Minister Narendra Modi-i September 13, 2025 nü Mizoram nung mezüngbuba railway line lapoktsüogo.

PM Modi-isa Aizawl den Delhi sendaktepba mezüngbuba Rajdhani Express tenzüksüogo.

Indian Railways putiotsü nung tayongzükba tulu ajuruba mapa rongnung Rs 8,070-crore Bairabi-Sairang railway line ka ya lir. Iba mapa ya 2008-09 nung inyaksü lemsüksü aser

2015 nungi mapa tenzü.

Iba railway line nung tunnels 45, major bridges 55 aser minor bridges 87 lir.

PM Modi-isa iba sentong nung express trains tasen 3-Sairang (Aizawl)-Delhi (Anand Vihar Terminal) Rajdhani express, Sairang-Guwahati Express aser Sairang-Kolkata Express sayatsüogo.

"Mizoram atema tongtipang anogo kechiyong parnok India'er railway map nung adener. Tongtipang

infrastructure projects inyakdar" ta Narendra Modi-i ashi.

PM Modi-i Lawngtlai-Siaha Road nung Chhintuipui bridge, Khelo India Multipurpose Indoor Hall aser Mualkhang nung LPG bottling plant ka atema lung azüngtsüogo.

Paisa Kawrthah nung Pradhan Mantri Jan Vikas Karyakram (PMJVK) scheme kübok residential school ka aser Tlangnuam nung Eklavya Model Residential School ka lapoktsü.



Quito, Sept. 17 : Diesel jenjang timba akumba mechi transport unions temi longkak aitba sülen Ecuador Tir Daniel Noboa-i Mongulbarnü province tenet nung anogo 60 atema state of emergency sangdonga lir. Iba sangdong ajanga armed forces aser national police dang tensa azüoktsü, azüdokshi nokdangtsü aser nüburtem kumzüka alitsü atema nüngdakba mera agitsü temelaba agüja lir.

Lab test ajanga Alexei Navalny nem miim agütsüba jangjar

Moscow, Rongjui/Sept. 17 (Agencies): Russia nunger opposition lenir Asür Alexei Navalny kinungtsü Yulia Navalnaya-i Bodhbarnü ashiba agi, bendang lima nung laboratory anati la kinungbo nem miim agütsüba jangjaogo.

Putin den tokteper tejangja Navalny ya Russia ketdangsür temi "extremist" ta sangdonga liasü aser pa February 16, 2024 nü Arctic penal colony ka nung süaka iba obendang ya tang tashi lir.

Navalny tembar temibo pa ya Kremlin-i tepset ta tai tongloktsür, saka Russia ketdangsür temi pa hypertension ajanga 'heart arrhythmia' adokdaksüba densema tashidak temeyoktep ajanga asü ta ashir. Social media X nung video

ka lemsatepba nung bendang lima alila Navalnaya-i ashiba agi, 2024 küm Russia nungi miima shibeleba biological samples ya laboratories ana nung tendanga liasü.

"Onoki Alexei indang biological materials tem bendang limai bener otet. Linük balala ana nung aliba laboratories nung tendang. Laboratory ana ya khenyongi tesendaktep mali aser Alexei nem miim agütsü ta jangjatet. Item results ya nüburtem asoshi tongtipang lir aser sangdongtsüla. Asenok ajaki ochi metettsü langa lir," ta lai ashir.

Alexei Navalny tepuokdak alidang mapang ajak nung camera nungi repranga liasü, saka pa tasütsü mapang agiba surveillance footage tem

samaogo, ta Navalnaya-i ashir. Ajisüaka lai laboratory temi koba miim ngutetar mashi.

Saka Kremlin odongtar Dmitry Peskov-ibo Navalnaya-i jembiba indang memetet ta ashir. Kasa mapang Navalny tembar temia tesüiba mapang mongui aliba noksa tem prokshia liasü aser item ya pa asüba sülen tepuokdak tangokba lir ta ashir.

Noksa nungya cell temesü ka atem nung saksüba aser azü mesük den anasa notebook ka aser Oxford dictionary ka liasü.

Pa cardiac tebilemtsü agi asü ta Russia-i sangdongba bhukumtsü mechi medical records melenshiba nung ajemdaker Navalny nem miim agütsü südi, ta taoba küm The Insider-ia shia liasü.

Tesendaktep indang jembitsü Qatar yimsüsüri Jordan semdanger

Amman, Rongjui/Sept. 17 (Agencies): Tawa Israel-i Doha amakba aija Arab aser Islamic lenirtem jaoka senden mener anogo ishika lir Jordan chuba ajurutsü atema Qatari Emir Sheikh Tamim bin Hamad Al Thani-i Amman semdangba mapang lir.

Qatar lenir ya Bodhbarnü Jordan yimtiba tonga aru, kong pa King Abdullah II, Crown Prince Hussein Abdullah aser Jordan ketdangsür temi agizüksü.

September 9 nü Doha nung Israel mitkari nisung aliba ki ka maka nisung trok tepsetba sülen emir asoshi ibai mezüngbuba alitsü. Qatar yimtiba nung Hamas lenirtem senden mena lia amakba ya tasü mait aser ashikülak mapa ka lir ta pai aija lir.

Hombarnü Gulf Cooperation Council (GCC) senden amenba mapang "joint defence mechanism" tenzüksü züngzüktep.

Israel-i amakba sülen US-Qatar tesendaktep yanglushitsü meranga United States Secretary of State Marco Rubio-i Doha nung emir ajurur anogo ka lir Sheikh Tamim aini aoba ya kanga tongtipang lir ta Amman nungi osangbener kati ashir.

Linük ana asoshi ibai

tongtipang alitsü ta imlar, kechiaser Doha nung Hamas dak tenük yoker Israel-i amakba sülen mezüngbuba alitsü, ta ashir.

Israel-i Doha nung amakba den külemi ano Gaza nung Israel-i kin ajunga samatsütsü nükjiding nung raraba indanga jembitsü ta ashir.

Emir-i Jordan semdangba nung tetetzü lir, kechiaser Palestine nunger nem teyari agütsüba nung linük ana ya lungjemer inyaker.

Kasa mapang Israel-i Gaza City amakba Qatar indang Foreign Ministry-i aitsü aser ibai adianu Palestine nunger anema "war of genocide" ulushiba ama züngshir ta ashir.

Yimjung teimla raksatsütsü sentong nung shilem ka ama amaker aser region aser international security nung tetsükdaktsü agütsür, ta ministry ajanga ashir.

Emir aser chuba ya senden balala amentsü aser yangi mitkar tsütsü tesendaktep nung rangloktsü aser taruba hopta United Nations General Assembly amentsü lia Israel-i Doha nung amakba indang ya süoki ia jembitsü imlar.

Parnoki tesendaktep tajungba akumtsü aser Syria nung teyari agütsütsü indanga jembitsü.

Israel-i Gaza City nungi tugutsü atema lenmang tasen ka lapoktsü

Cairo, Rongjui/September 17 (Agencies): Israel military-i Bodhbarnü ashiba agi, Palestine nungertem Gaza City toktsür aotsü atema ghonda 48 asoshi lenmang tasen ka lapoktsüogo. Yimti nung Hamas pur den raratsü atema civilian tem anintsü merangba mapang tang iba jenjang ya agiogo.

Iba yimti nung nisung meyrejang aika jenoka lir, aser aikati Israel-i south leni aotsü asoshi tetuyuba agütsüba sülen manidakner, kechiyong lenmang nung lendong aika keta lir, south len chiyongtsü agi kanga anünger aser iba den parnok teti atema iba tesem nung lidaktsütsü ta tsübua bilemer.

"Onoki Gaza City toktsü onüaka onok meyipa arutettsü marutettsü kecha mejangja. Rara ya tembangtsü metembangtsü mejangja, anungji

ni idaki Sabra nung ni alidakang süner," ta school tesayur Ahmed-i phone ajanga ashir.

Bodhbarnü Israel-i asendenshir amakba mapang Gaza Strip nung nisung 30 tepsetogo, kong Gaza City nung nisung 19 asüba densema lir, ta local health ketdangsürtemi ashir.

Gaza indang urban centre tongtiba atsüngtsü atema ali ajanga tesem balala maka ao tenzükba sülen anogo ka lir tank tem Gaza yimti teyong aser anüolen tesem asem nungi yokogo, saka tang tashi nung parnoki jenjang tesashi agibabo kecha mali.

Israel nunger ketdangsür kati ashiba agi, military operation ya nüburtem south leni yoktsü aser iba sülen taruba ita ka ana raratsü asoshi lir.

Ketdangsür-isa, civilian

100,000 shi-i yimti toktsür maotsü Israel-i imlar aser iba yimti atsüngtsü atema ita ishikabo agitsü. Kasa mapang nung Hamas telok den ceasefire atema nangzüktepra iba inyakyim ya anentsü, ta ashir.

Ajisüaka Israel-i taoba hopta Doha nung Hamas pur yimden yimsüsüba tsütsü lenirtem amakba sülen ceasefire benoktsü atema kecha timla mali aser iba ajanga Qatar kanga mepeladaktsür, shirnoki ceasefire atema sensaksemja arudar.

Israel tembar United States densema linük balalai Doha amakba atema aitsüba mapang Ato Kilonser Benjamin Netanyahu-i, Israel-i Hamas pur lenirtem kong lidri laika iba tesemji amaktsü, ta ashir.

Mongolbarnü Doha

semdangba mapang U.S. Secretary of State Marco Rubio-i ashiba agi, ceasefire benoktsü atema mapang tatsüka dang lir. Israel-i Gaza nung Hamas pur tashiyim agi samatsütsü sentong yanglur aliba indang pai jembia liasü.

Gaza City nung leaflets tsükdaktsüba nung military-i ashiba agi, Palestine nungertemi south leni jena aotsü atema tang lapoktsüba Salahudin lenmang amshitettsü, koba Hokolbarnü anogo tom tashi dang lapoktsütsü.

"Nüburtem south leni aoba mapang map nung yellow agi asüksü aliba lendi nung dang senzütsüla. Security force aser traffic sign tem tetutyuba sülen anidakang," ta parnoki ashir.

Ajisüaka civilian tem atema tensa kanga mejungi lir, shirnoki tetsüng agi, kadhu gari aser garitem nung odar.

2023 küm raraba mapang Gaza City ya timba ajarepogo, saka Palestine nunger million 1 shi pei kidangi meyipa aru. Parnok maneni yimti nungi kangshia yokba ajanga Gaza nung alirtem timba south nung adenshitsu, kong yatzür agi meneper lir.

United Nations, teyari agütsüba lokti tentettem aser bendanger sorkartemi Israel-i Gaza City amakba aser nüburtem aninba aitsüogo.

U.N. Commission of Inquiry-i Mongolbarnü ashiba agi, Israel-i kin ka meshimeshia samatsütsü merangogo,

ajisüaka Israel-i iba taitsüba ya magizük aser iba ya teyazü lir ta shiogo.

Kasa mapang nung Israel nunger sepaitemi Gaza City anütoklen tesemtem azüokogo aser parnoki yimti southeast, north aser northwest len tesem balala maneni makdar aser item tesem tem nungi tank tem yimti teyong aser anüoleni odar.

"Gaza meshi meshia samatsütsü merangdar. Küm meyrejang aika tin yimti tasümaait alima jakdang meshi meshia samatsütsü merangdar," ta school tesayur Ahmed-i ashir.

Palestine aser UN ketdangsürtemi ashiba agi, Israel-i "humanitarian zone" ama mekazüka toktsüba south len tesem balala densema tesem kecha kümzüka mali. Mongolbarnü anüng ajanga amakba mapang Gaza City toktsür south leni oya aliba gari ka nung nisung pongu tepsetogo.

Nuseirat refugee camp nung Israel nunger sepaitemi Bodhbarnü anüng ajanga aiben atongtepa tua sür aliba kitem raksatsüogo aser iba ajanga nüburtem jenshia aotsüsa akim.

Hamas-i achayangba Gaza sorkar media office sangdong ka ajanga ashiba agi, Israel-i August 10 nü nungi tenzüka tang tashi nung nisung aliba ki 1,600 raksatsüogo.

Israel nunger sepaitemisa Gaza City nung süki 13,000 raksatsüogo, kong nüburtem jenoka liasü, ta parnokisa shisem.



West Bank tiyonglen Ramallah nung Israel mitkar temi operation agidang Palestine nunger longkak aitertemi Israel mitkartem dak long agi aonba noksa nung angur.

China Open: Satwik aser Chirag nati Malaysia nungter tarep kokogo



Rongjui/September 17, 2025 (Agencies): India nungter tebur tarep asayar Satwikasiraj Rankireddy aser Chirag Shetty nati Bodhbarnü China Open nung Malaysia nungter tarep Junaidi Arif aser Roy King Yap na kokogo.

Rankireddy aser Shetty nati iba asaya nung Malaysia nungter tarep ya 24-22, 21-13 agi straight games nung koka liasü. Tarep ana tsüngda minute 42 asaya.

Rankireddy aser Shetty nati tawa kanga junga asaya arudar. Tenati taoba ita World Championship nung bronze medal angu aser taoba hopta Hong Kong Open nunga final tonga asaya-a tanabuba jenjang

nung tembanga liasü.

Ajisüaka tia maka kasa anogo tebur kija asaya nung Lakshya Sen-i 11-21, 10-21 agi Toma Junior Popov mekoki tsükogo.

Ayush Shetty-a mezügbuba round nung tsükba sülen iba asayamung nung India nungter tebur kija asayar ka danga anunga mali.

Tarep temeyoktep asayar Dhruv Kapila aser Tanisha Crasto nata second-seeded China nungter tarep Feng Yan Zhe aser Huang Dong Ping nati 19-21, 13-21 agi tsükdaktsüogo.

Tebur tarep asaya nung mezügbuba game nung Satwik aser Chirag nati kanga meranga asayarang asaya

akok. Asaya tatem tashi tarep ana tsüngda kanga toktepba asayaba sülen tenati minute 21 ni mezügbuba game ya koka liasü.

Tanabuba game tetenzüklen tena tejakdang liasü saka Arif aser Yap nati menepa tua point 5-5 aküm. Ajisüaka iba sülen India nungter tarep ya 11-6 agi timba aküm aser Malaysian nungter tarep yagi telangzüba tajung magütsüteti asaya kokdaktsü.

Tetsür kija asaya nung P. V. Sindhu-i mezügbuba asaya koka pre-quarterfinals tongtetogo, aser la taruba asaya sixth-seeded Thai tsür Pornpawee Chochuwong den asayatsü.

Aryna Sabalenka yiruba ajanga China Open nung masayatetsü

Rongjui/September 17, 2025 (Agencies): Grand Slam pezü koker alila Aryna Sabalenka US Open asayaba mapang yiruba tang tashi taneptsü junga mongutetba sülen China Open nung masayatsü telemetba agiogo.

Hopta ana tejakdang arishi küm 27 tain Sabalenka-i Flushing Meadows nung US Open tetsür kija asaya final nung Amanda Anisimova koka taküm asoshi Grand Slam tatembangbuba koka liasü.

La USA nung iba Grand Slam nung asayaba mapang yiruba ajanga Beijing nung asayatsü aliba taruba asayamung nung masayatetsüsa kümogo.

"Aryna US Open nung asayaba mapang nung yiruba tang tashi junga taneptsü monguteti lir, anungji la 2025 China Open nung masayatsü," ta asayamung ayongertemi

metetdaktsü.

Belarus tsürla yagi la taküm Beijing nung masayatetsüsa akümba atema kanga tezü adangba lemsatepogo, saka la taruba ita Wuhan Open nungbo asayatsü atema taneptsü takaratiba nung angutsü atema inyaktsü tenangzükbaga agüja liasü.

Sabalenka ya Wuhan Open defending champion lir, aser lai taküm iba asayamung nung la indang title defend asütsü tebilemba lir.

"Ni taneptsü angutsü atema rangloker inyaktsü aser takaratiba nung court-i meyipa arutsü asoshi merangtsü," ta lai shisem.

"Ni China nung kü indang fan tem den ajuruteptsü matateter. Ni taruba kümbo Beijing nung asayatsü yongyaseta atar," ta arishi küm 27 tain Belarus tsürla yagi ashi.

Juan Mata Melbourne Victory nung denogo



Rongjui/September 17, 2025 (Agencies): Toba Chelsea aser Manchester United midfielder Juan Mata-i Australia club Melbourne Victory den tenangzüktepba yangluogo.

Arishi küm 37 tain asayar shiba 2010 küm World Cup akokba Spain team nung dena liasü, pa taoba season A-League nungsa Western Sydney Wanderers nungi asayaba sülen tang iba club nung denogo.

Pa taoba season tenetben dang asaya aser ashiba agi, pa asaya timba nung asayanüba agi Victory nung denogo.

"Ni tenüng agi asayatsü atema takhangba agütsüba nisung ka masü," ta Mata-i ashi.

"Iba club yagi ni aginer ta bilemer. Iba team nem takok marok kokdaktsütsü atema ni tejangraba lir, aser iba den linük nung football asaya tashi itshidaktsütsü atema sentong aliba nung shilem ka ama club den inyaktsü tejangraba lir," ta pai ashi.

Mata ya takok tajung ngua asayaba asayar ka lir aser pai 2012 küm Spain tenüng nungi European Championship-a kokogo. Final nung Italy goal 4-0 agi akokba asaya nung paia goal idakja liasü.

Valencia nung kanga takok ngua asayaba sülen pa 2011 küm Chelsea nung aden aser Champions League, Europa League aser FA Cup koka liasü.

Iba sülen pa 2014 küm pound million 37. 1 yong Manchester United nung oa aden aser club-i FA Cup, League Cup aser 2016-17 season nung mezügbuba Europa League akokba nung teyari agüja liasü.

Iba sülen pa Galatasaray aser Vissel Kobe na nung mapang tatsütsü asaya aser Australia-i ao.

Victory pur ya taoba season runners-up liasü aser parnok season tasenba nung mezügbuba asaya Auckland FC den October 18 nü asayatsü.

ICC Rankings: Chakravarthy No. 1 T20I bowler kümogo



Rongjui/September 17, 2025 (Agencies): India nungter spinner Varun Chakaravarthy ICC Men's T20I bowling rankings nung temaba jenjangi tuogo. Pa ya Jasprit Bumrah aser Ravi Bishnoi na sülen temaba jenjang tongtetba India nungter bowler tasembuba lir.

Arishi küm 34 tain asayar yagi tang asay aliba Asia Cup densema tawa asaya balala nung kanga junga asaya aruba sülen tang temaba jenjangi tuogo.

Chakaravarthy-i taküm England den asayaba mapang pa indang career nung tanabenbuba asaya ka nung wicket pongu agiba sülen tang temaba jenjang tongtetogo. Asia Cup nung pai UAE den asayaba mapang run 4 agütsür wicket 1

agi aser Pakistan den asayaba mapang run 24 agütsür wicket ka agia rankings nung jenjang asem tejakdang tua liasü.

Kasa mapang nung bowler tem rongnung New Zealand nungter Jacob Duffy tanabuba nung lir aser West Indies nungter asayar Akeal Hosein tasembuba aser Australia nungter asayar Adam Zampa pesübubai tuogo.

Rankings nung bowler tem aika jenjang junga kümogo. Sri Lanka nungter bowler Nuwan Thushara jenjang trok tejakdang tua tang trokbuba nung lir, Pakistan nungter bowler Sufiyan Muqeem aser Abrar Ahmed na 11 aser 16bubai tuogo. India nungter asayar Kuldeep Yadav-a jenjang 16 tejakdang tua tang

23buba nung lir.

T20I batting rankings nung Abhishek Sharma-ia pa indang career nung tang mezügbuba No. 1 jenjang tongtetogo. Batter tem rongnung England nungter asayar Phil Salt aser Jos Buttler na tanabuba aser tasembuba jenjang nung lir.

Batting rankings nung temelenshi aika adokogo aser South Africa nungter asayartem aika jenjang melenshiogo. Dewald Brevis jenjang ana tejakdang tua tang 11buba nung lir aser Aiden Markram-a jenjang 10 tejakdang tua tang 30buba tongtetogo.

Asia Cup ajanga asayartem aika rankings mlenshiogo. Sri Lanka nungter asayar Pathum Nissanka jenjang trok tejakdang tuogo aser Afghanistan nungter asayar Rahmanullah Gurbaz 19bubai tuogo.

Bangladesh nungter Tanzid Hasan aser India Test captain Shubman Gill nata jenjang yanglushia tang 35 aser 39buba nung lir.

All-rounder tem rongnung India nungter asayar Hardik Pandya maneni temaba jenjang nung lir. Pakistan nungter asayar Saim Ayub jenjang pezü tejakdang tua tang pongububa nung lir aser Abhishek Sharma-a jenjang pezü tejakdang tua 14buba nung lir.

BILEMDANGANG

"Tamang agi nisung ka nem timla agütsür."